



partii naleraq

UKA 2017/115-01

10-10-2017

Illoqarfinni nunat immikkoortuini qitiusumik napparsimaveqarfiusuni toqusimasut timaannik ikuallaaveqalersinnaaneraniq periarfissanik kiisalu aningaasaqarnikkut pitsaaqutinik pitsaanngequtinillu misissuinissamik Naalakkersuisut peqquneqarnissaat pillugu Inatsisartuni aalajangiiffisassatut siunnersuut. Taamattaq Naalakkersuisunit misissuiffiqineqassaaq innuttaasut toqusimasut timaannik ikuallaasalersinnaanermut periarfissaqalernissaq tapersersorneqarnersoq. Misissuinerup inernera UKA18 aallartitsinnagu saqqummiunneqassaaq.

(Inatsisartunut ilaasortaq Kelly Berthelsen, Inuit Ataqatigiit)

Inatsisartunut ilaasortap Kelly Berthelsen, Inuit Ataqatigiinneersup - Illoqarfinni nunat immikkoortuini qitiusumik napparsimaveqarfiusuni toqusimasut timaannik ikuallaaveqalersinnaaneraniq periarfissanik kiisalu aningaasaqarnikkut pitsaaqutinik pitsaanngequtinillu misissuinissamik Naalakkersuisut peqquneqarnissaat pillugu Inatsisartuni aalajangiiffisassatut siunnersuutaa Partii Naleraq sinerlugu imannak oqaaseqarfisuarput:

Siunnersuummi aporfiusinnaasut ajornartorsiutaasinnaasullu eqqartorneqartut tunngaviatigut ilisarsinnaavagut paasilluarsinnaallugillu, tassami nalunngilarput sumiiffinni assigiinngitsuni siunnersuummi allaaserineqartut aamma takuneqarsinnaasut allanngortinneqarsinnaangaluartullu.

Tassami assersuutigiinnaraanni sumiiffiit ilaanni iliveqarfissaaleqinerit ajornartorsiutaapput, naak siunnersuutip taannarpiaq aallaaviginngikkaluaraa.

Isumaqarpugut siunnersuut susassaartut assigiinngitsut peqataatillugit eqqartorluarneqartariaqartoq, pingaartumik aamma ilagiinni suliaqartut assigiinngitsut.

Siunnersuut piviusunngortinneqassappat aningaasarpassuarnik naleqartussaasoq Naalakkersuisut akissuteqaamminni oqaatigaat aammalu suliassanik tulleriiarineri siullerpaanut ilanngunneqarsinnaanera kissaatiginngikkaat, illua-tungaatigulli misissuisitsinissamik allannguutissamik siunnersuuteqarlutik.

Isumarput naapertorlugu suliassaq ataatsimiititaliami susassaqartumik sukumiisumik nalilersuif-figineqartariaqarsoraarput pisariaqassappallu ataatsimiititaliaq nammineerluni allannguutissamik siunnersuuteqarpat pissusissamisoorsoraarput.

Taama oqaaseqarluta siunnersuutip aappassanneerreqannginnerani ataatsimiititaliami susassaqartumik suliarineqarnissaa inassutingaarput.

Anthon Frederiksen